



1993

20. A **Bruna Muzzolini Tomasin**
«Premi San Roc» pal 1993

Amìa cu l'anima poetica e mans di àur

Cjara Bruna, 'za di qualchi an in ca, culì in Borc San Roc, a' son propi li' feminis a fâ la part di leon rivuart ai premis.

Un segnâl pusitîf ch'al nus svela che Guriza 'e à ungrum di perlis in tal so scrin. Chist an a ti l'onôr dal premi e il grazie dal borc e da zitât.

Jo sai che il to spirt cussì 'zintîl, al s'incjanta a sintî tal bosc il rusignûl, i grîs sul prât e i gjai a buinora parâ via cul bec li' stelis.

Mi àn ancja dit che a tì, ti plâs unmònt il siminâ da ploja fina fina; che tu restis a bocja viarta a cjalâ la luna e che 'l to cûr si inteneris pal solengâ di un frut bessôl ta scuna.

A' cognossin benchel fûc che in pèt al ti sbusina e ti fâs preseâ sôl se ch'al è biel e bon intôr di te; che tu curis cun passion l'art di restaurâ

i documenz ch'a puàrtin li' ruis dal timp e, come 'za i mestris fiorentins, tû tu tagnis adun ancja in ta tô scuela, un grum di 'zovins passionâz di art a lavorâ.

Grazie di cûr a non di duc' pal to impegn e par dutis li' fadiis ch'a dâ una man a tirâ sù il vivi da zitât.

Guriza, ai 21 novembar dal 1993

Ana di Fara
(Anna Bombig)